

Bases reguladoras para a concesión de axudas para impulsar a formación de mulleres en postos de técnicas/adestradoras no ámbito deportivo na provincia de Pontevedra

O deporte consolidouse como unha actividade esencial de máxima relevancia na sociedade actual. Asíase directamente a un modo de vida saudable que contribúe a mellorar a condición física e fomenta valores coma os de superación, loita, respecto ás demais persoas e ás normas, e de crecemento persoal baseado no esforzo e na mellora do propio rendemento.

Debido á escasa presenza de mulleres en determinados ámbitos do deporte e, en concreto, nos equipos técnicos, é necesario articular vías para aumentar o número de adestradoras nos equipos femininos e masculinos de deporte base e de elite.

Así, a muller debería estar presente en todas as disciplinas e ámbitos do deporte base e de elite como deportista, adestradora ou xuíza. Con iso, tamén se conseguirá que nun futuro un maior número de mulleres poida ocupar altos cargos de decisión en organizacións deportivas.

Deste xeito, unha das liñas prioritarias debe ser a formación especializada, entendida como un elemento de excelencia, dirixida a adestradoras e técnicas no ámbito deportivo.

No ámbito competencial, a Constitución española, no seu artigo 43.3, recolle que os poderes públicos fomentarán a educación física e o deporte como un dos principios reitores da política económica e social.

Na Lei 10/1990, do deporte, contéplase a importancia da investigación e dos ensinos deportivos, os cales poderían levarse a cabo en centros recoñecidos polo Estado ou, no seu caso, polas comunidades autónomas con competencias en materia de educación.

Así mesmo, na Lei 3/2012, do deporte de Galicia, nos seus termos, a lexislación de réxime local e a lexislación sectorial do Estado, establécese que as deputacións exercerán no seu correspondente ámbito territorial as competencias para fomentar, promover e difundir o deporte.

Do mesmo xeito, o principio de igualdade como dereito está recollido na Constitución española, nos artigos 9.2 e 14, e tamén na Lei orgánica 1/1981, de 6 de abril, do Estatuto de Autonomía de Galicia. Ambas as normas sinalan que os poderes públicos teñen o deber de promover as condicións para que a liberdade e a igualdade das persoas sexan reais e efectivas.

Na Lei orgánica 3/2007, de 22 de marzo, para a igualdade efectiva de mulleres e homes, que se constitúe como o marco xurídico e legal da igualdade entre mulleres e homes en todo o Estado español, e no Decreto legislativo 2/2015, de 12 de febreiro, polo que se aproba o Texto refundido das disposicións legais da Comunidade Autónoma de Galicia en materia de igualdade, estipúlase que os poderes públicos, no marco das súas competencias, deberán incorporar medidas tendentes a acadar a igualdade efectiva.

Por todo o exposto anteriormente, a Deputación de Pontevedra quere asumir un compromiso firme coa dimensión social da educación e do deporte a través dunha política de axudas ao estudo que garanta a cohesión social e a igualdade de oportunidades no ámbito das titulacións dos ensinos deportivos, que se rexerán polas seguintes bases:

1. Obxecto

O obxecto desta convocatoria é fixar as bases reguladoras das axudas destinadas a fomentar e apoiar a formación de mulleres nos postos de adestradoras ou técnicas nos clubs deportivos.

2. Financiamento

A contía total destinada a estas axudas é de quince mil (15.000,00) euros, con cargo á aplicación 21/340.3410.489.06 do vixente Orzamento provincial.

3. Alcance

As axudas destinaranse aos ensinos deportivos oficiais de réxime especial e federativos, coa finalidade de formar técnicas deportivas nunha determinada modalidade ou especialidade.

O obxectivo dos ensinos deportivos é preparar o alumnado para a actividade profesional no sistema deportivo nunha modalidade ou especialidade deportiva nos niveis de iniciación, tecnificación e alto rendemento, e adaptar a súa formación ao mundo laboral e deportivo.

Nestas bases consideraranse adestradora ou adestrador e técnica ou técnico deportivo quen dispoñan da titulación oficial ou equivalente, de conformidade coa lexislación vixente.

4. Persoas beneficiarias

Poderán beneficiarse desta convocatoria as mulleres que cumpran os seguintes requisitos:

- Estar empadroadada na provincia de Pontevedra polo menos desde o 1 de xaneiro de 2021.

5. Procedemento de concesión

O procedemento de concesión das axudas realizarase en réxime de concorrencia non competitiva, en atención á existencia de crédito.

O importe máximo das axudas será de 500,00 €. No caso de que o crédito dispoñible fose insuficiente procederase a facer un rateo proporcional entre todas as solicitudes, cubrindo a totalidade de axudas.

En todo caso o importe da axuda recibida non poderá superar o 80 % do importe da matrícula.

A concesión destas subvencións é compatible coas doutras administracións públicas que se reciban para o mesmo fin, tendo en conta que o conxunto de todas elas en ningún caso poderá superar o 100 % do importe da matrícula presentada.

6. Gastos subvencionables

Considerarase gasto subvencionable aquel que, de maneira indubidable, responda á natureza da finalidade subvencionada; terán esta consideración:

- Os gastos de matrícula dos títulos oficiais de adestradora ou adestrador ou e técnica ou técnico das diferentes federacións ou dos estudos oficiais de réxime especial dos ensinos deportivos iniciados en 2021 (o período lectivo poderá ser en 2021 ou en 2021/2022).

7. Lugar de presentación de solicitudes

As solicitudes presentarase preferentemente por medios electrónicos a través do formulario normalizado dispoñible na Sede electrónica da Deputación de Pontevedra, <https://sede.depo.gal>.

Opcionalmente, as solicitudes poderán presentarse presencialmente en calquera dos lugares e rexistros establecidos na normativa reguladora do procedemento administrativo común.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de

identificación baseados en claves concertadas (sistemas de usuario e contrasinal) e certificados electrónicos (incluído o DNle).

8. Prazo de presentación de solicitudes

O prazo de presentación de solicitudes empezará a partir do día seguinte ao da publicación do anuncio destas bases no *Boletín Oficial da Provincia de Pontevedra* (BOPPO) e na Base Nacional de Subvencións (BNS), e finalizará o 1 de decembro de 2021..

9. Comprobación de datos

Para a tramitación deste procedemento consultarase automaticamente os datos incluídos nos seguintes documentos elaborados polas administracións públicas:

- NIF da persoa solicitante
- Certificado de residencia da persoa solicitante
- Certificado de estar ao corrente das obrigas tributarias coa Axencia Estatal Tributaria, coa Seguridade Social, coa Facenda autonómica e coa Deputación de Pontevedra

No caso de que as persoas interesadas se opoñan ás devanditas consultas deberán indicalo no cadro habilitado no formulario de inicio e presentar os documentos correspondentes.

Excepcionalmente, se algunha circunstancia imposibilitase a obtención dos citados datos poderáselles solicitar ás persoas interesadas a presentación dos documentos correspondentes.

10. Documentación que se debe entregar

As persoas solicitantes deberán entregar, xunto coa solicitude, a seguinte documentación:

- Documento acreditativo do pago da matrícula do curso obxecto de subvención

A documentación complementaria presentarase preferiblemente por vía electrónica. As persoas interesadas responsabilizaranse da veracidade dos documentos que entreguen. Excepcionalmente, a Deputación de Pontevedra poderá requirir a presentación do documento orixinal para cotexalo coa copia electrónica achegada.

11. Notificacións

As notificacións de resolucións e actos administrativos practicaranse preferentemente por medios electrónicos. As persoas interesadas que non estean obrigadas a recibir notificacións electrónicas poderán decidir e comunicar en calquera momento que as notificacións sucesivas se practiquen ou deixen de practicarse por medios electrónicos.

As notificacións realizaranse a través do Servizo de Notificacións Electrónicas, dispoñible na Sede electrónica da Deputación de Pontevedra, <https://sede.depo.gal>. Este sistema remitiralles ás persoas interesadas avisos da posta a disposición das notificacións á conta de correo que conste na solicitude. Estes avisos non terán, en ningún caso, efectos de notificación practicada e a súa falta non impedirá que esta se considere plenamente válida.

A persoa interesada deberá manifestar expresamente a forma de notificación escollida (electrónica ou en papel).

As notificacións por medios electrónicos entenderanse practicadas no momento no que se acceda ao seu contido. Se o envío da notificación electrónica non fose posible por problemas técnicos, a Deputación de Pontevedra notificaráa polos medios previstos na normativa reguladora do procedemento administrativo común.

12. Trámites administrativos posteriores á presentación de solicitudes e a súa emenda

Todos os trámites administrativos que as persoas interesadas deban realizar durante a tramitación deste procedemento faranse preferiblemente por medios electrónicos a través do modelo "instancia xenérica", dispoñible na Sede electrónica da Deputación de Pontevedra (<https://sede.depo.gal>), ou presencialmente en calquera dos lugares e rexistros establecidos na normativa reguladora do procedemento administrativo común.

Se a solicitude non reunise os datos esixidos na convocatoria ou calquera dos previstos no artigo 66 da Lei 39/2015, de 1 de outubro, do procedemento administrativo común das administracións públicas (LPACAP), requiriráselle á persoa interesada, de conformidade co establecido no artigo 68 desta, que nun prazo de dez (10) días hábiles emende as faltas ou presente os documentos preceptivos e indicaráselle que, se non o fai, entenderase desistida a súa solicitude, que se arquivará sen máis trámites.

13. Instrución do procedemento

A instrución do procedemento de concesión das axudas correspóndelle ao xefe do Servizo de Deportes, quen realizará de oficio todas as actuacións que estime necesarias para a determinación, o coñecemento e a comprobación dos datos, en virtude dos cales emitirá un informe-proposta no que figure a valoración das solicitudes segundo os criterios sinalados nestas bases e se explique o sistema seguido, de conformidade co previsto no artigo 19 da Ordenanza xeral de subvencións da Deputación de Pontevedra (OXSDEPO) e no artigo 24 da Lei 38/2003, do 17 de novembro, xeral de subvencións (LXS).

Informe de fiscalización de Intervención de todos os expedientes e informe-proposta.

Posteriormente, a Comisión de valoración das solicitudes de subvención realizará un estudo do informe-proposta do xefe de servizo. Este órgano colexiado estará composto por:

- Presidenta ou presidente: o deputado delegado da área de Deportes ou a persoa a quen designe
- Vogais: dous membros do persoal técnico do Servizo de Deportes
- Secretaria ou secretario: unha ou un funcionario do Servizo de Deportes, que actuará sen voto

A Comisión de valoración poderá:

- Obter cantos informes estime necesarios para resolver
- Emitir un informe das solicitudes de subvención

As propostas de concesión de subvencións someteranse á aprobación do órgano competente.

Transcorridos seis meses a partir do día seguinte a aquel no que finalice o prazo de presentación de solicitudes sen notificar a resolución, as persoas interesadas estarán lexitimadas para entender a solicitude como desestimada por silencio administrativo.

14. Publicacións de actos

O acto de resolución do procedemento será obxecto de publicación no BOPPO e terá os efectos dunha notificación ao afectar unha pluralidade de persoas solicitantes (artigo 45 da LPACAP).

Así mesmo, publicarase na páxina web da Deputación de Pontevedra.

15. Obrigas das persoas beneficiarias

As persoas beneficiarias deberán cumprir coas obrigas da Lei 9/2007, de 13 de xuño, de subvencións de Galicia (LSG). En particular, durante este exercicio e o seguinte deberán:

- Superar o curso de maneira satisfactoria
- Cumprir e aceptar todo o estipulado nestas bases
- Darlle a adecuada publicidade ao carácter público do financiamento das axudas e colaborar coa Deputación na promoción do deporte e da actividade física na provincia se esta o requirise
- Someterse ás actuacións de comprobación, así como a calquera outra actuación que puidesen efectuar os órganos de control competentes, para o que se entregará toda a información que se lles pida no exercicio das actuacións correspondentes

16. Xustificación e pago

Para cobrar a subvención as persoas solicitantes deberán presentar a seguinte documentación obrigatoriamente por medios electrónicos a través do modelo "instancia xenérica", dispoñible en <https://sede.depo.gal>:

- a) Certificado académico ou federativo de que superou o curso

O pago efectuarase mediante unha transferencia bancaria á conta indicada na solicitude.

Para cobrar a subvención as deportistas deberán estar ao corrente das súas obrigas tributarias coa Axencia Estatal Tributaria, coa Facenda galega, coa Seguridade Social e coa Deputación.

17. Transparencia e bo goberno

De conformidade co establecido na normativa de transparencia e bo goberno e co artigo 15 da LSG, a Deputación de Pontevedra publicará na súa páxina web a relación oficial de persoas beneficiarias e o importe das axudas concedidas. Incluirá igualmente as referidas axudas e as sancións que, como consecuencia delas, se puidesen impoñer nos correspondentes rexistros públicos, polo que a presentación da solicitude leva implícita a autorización para o tratamento necesario dos datos das persoas beneficiarias e a referida publicidade.

18. Devolución e reintegro

As subvencións concedidas deberán devolverse ou reintegrarse nos seguintes casos:

- Por obtelas falseando as condicións requiridas
- Por non aplicalas aos fins para os que se concederon
- Por incumprir a persoa beneficiaria as obrigas asumidas e as condicións fixadas nestas bases

19. Protección de datos

Os datos persoais obtidos neste procedemento serán obxecto de tratamento por parte da Deputación de Pontevedra, en calidade de órgano responsable, coa finalidade de xestionalos, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento dos datos baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado "normativa aplicable", dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

20. Recursos

Contra estas bases e as resolucións administrativas que se adopten na súa execución poderá interpoñerse un recurso potestativo de reposición ante o órgano que as ditou no prazo dun (1) mes, que se entenderá como desestimado se transcorrese este período de tempo sen recibir contestación; neste caso poderá interpoñerse un recurso contencioso-administrativo ante o xulgado do Contencioso-Administrativo, segundo o previsto no artigo 8 da Lei 29/1998, de 13 de xullo, da xurisdición contencioso-administrativa, no prazo de dous (2) meses. Igualmente, contra esta resolución tamén poderá interpoñerse directamente un recurso contencioso-administrativo no prazo indicado. En todos os casos, os prazos contaránse a partir do día seguinte ao da recepción da correspondente notificación ou da data na que o recurso de reposición se entenda desestimado.

21. Dereito supletorio

Para o non disposto nestas bases seguirase o establecido na OXSDEPO; nas Bases de execución do Orzamento provincial para o exercicio 2021; na LXS; na LPACAP; e na demais lexislación aplicable.